

Cegah Mungkar Menurut Sunnah Nabi

Oleh : Nor Saadah Binti Musa
(Pensyarah ACIS UiTM Kampus Seremban)

Masalah sosial dalam kalangan masyarakat hari ini semakin membimbangkan. Bilangan mereka yang terjebak dalam pelbagai jenis jenayah seperti membunuh, merogol, peras ugut, mencuri dan sebagainya semakin meningkat dari semasa ke semasa. Peningkatan ini temasuk juga pembabitan masyarakat beragama Islam dalam kesalahan jenayah syariah seperti sumbang mahram, berzina, berkhalwat, hamil luar nikah, percubaan melakukan persetubuhan haram dan seumpamanya.

Berdasarkan laporan Berita Harian bertarikh 13 September 2016, statistik Jabatan Pendaftaran Negara menunjukkan sejumlah 159,725 bayi luar nikah dilahirkan oleh ibu yang beragama Islam sejak 2013. Daripada jumlah itu, 53,492 dilahirkan pada 2013; 54,614 pada 2014 dan 51,169 pada 2015. Secara purata kira-kira 140 bayi luar nikah dilahirkan setiap hari oleh ibu yang beragama Islam pada tahun 2015. Statistik Kementerian Kesihatan pada tahun 2015 pula mendedahkan sebanyak 3,980 atau 28.8 % daripada 13,831 remaja berusia 10 hingga 19 tahun mengandung anak luar nikah. Sementara statistik tangkapan kesalahan jenayah syariah pula dari tahun 2012 hingga tahun 2014 yang direkodkan oleh JAKIM, tangkapan membabitkan jenayah khalwat mencatatkan angka tertinggi di antara kesalahan utama jenayah syariah. Sekalipun jenayah khalwat, ia tidak boleh dipandang ringan kerana pelaku jenayah tersebut mempunyai kebarangkalian yang sangat besar untuk terjebak ke kancan kemungkaran yang lebih berat seperti zina.



Fakta-fakta tersebut hanyalah sebahagian daripada statistik permasalahan sosial yang berleluasa berlaku dalam masyarakat kita pada hari ini. Realitinya, lambakan kes-kes jenayah dan masalah sosial yang menular dalam negara ini amat menggerunkan. Tindakan pencegahan dan rawatan yang tepat dan komprehensif amat mendesak untuk dilaksanakan segera demi membendung penyakit sosial yang semakin membarah dalam masyarakat hari ini. Ilmu dan kefahaman yang jelas dalam memahami keutamaan dan metodologi pencegahan kemungkaran menurut Syariat Nabi SAW adalah sangat penting supaya sebarang usaha pencegahan dan rawatan penyakit sosial ini benar-benar berkesan dan mencapai matlamat Syarak untuk mewujudkan '*Baldatun thoyyibah wa Rabbun Ghafur*'.



Bahana seks bebas Gugur janin cukup sifat

> Umurnya baru 17 tahun, tapi seorang remaja wanita sudah tiga kali hamil luar nikah. Dua bayi sebelum ini diserahkan kepada orang lain, tetapi kandungan ketiga jenayah digugurkan sendirian di rumah sewa. Akhirnya, janin yang cukup sifat itu mati dalam keadaan menyedihkan.

-10211

Jenis yang sulit versyen statement tidak dikenali kesan

Sunnah Nabi SAW merupakan penawar terbaik dalam mengubati penyakit sosial dalam kalangan masyarakat hari ini. Rasulullah penyelamat roh dan fizikal manusia, membangunkan tamadun rohaniah dan tamadun material yang selamat dan menyelamatkan. Hingga dengan itu manusia dan dunia yang sudah rosak dengan dahsyatnya berjaya dipulihkan. Firman Allah SWT di dalam al-Quran Surah at-Taubah ayat 128 yang bermaksud: "Sesungguhnya telah datang kepadamu seorang rasul dari kaummu sendiri, berat terasa olehnya pen-

deritaanmu, sangat menginginkan (keimanan dan keselamatan) bagimu, amat belas kasihan lagi penyayang terhadap orang-orang mukmin."

Rasulullah SAW mempunyai perasaan yang sangat tulus dan jiwa yang sangat hebat hingga Baginda SAW mampu menanggung beban dakwah yang amat berat ketika mana majoriti masyarakat ketika itu berada dalam keadaan jahiliyyah. Keberkesanan dakwah Rasulullah SAW dalam menyelamatkan ummah daripada belenggu jahiliyyah juga didokong penuh oleh faktor kepimpinan langsung daripada Wahyu Allah SWT. Ini bertepatan sebagaimana firman Allah SWT di dalam al-Quran Surah An-Najm ayat 4 hingga 5 yang bermaksud: "*Ucapannya itu tiada lain hanyalah wahyu yang diwahyukan (kepadanya), yang diajarkan kepadanya oleh (Jibril) yang sangat kuat.*"

Rasulullah SAW berjuang menyampaikan wahyu yang diturunkan Allah dan praktikal wahyu itu diterjemahkan di dalam sunnah Baginda SAW. Antara sunnah yang jarang difikir dan diamal oleh umat mutakhir ini adalah bagaimana pendekatan Rasulullah SAW dalam menyelesaikan permasalahan sosial dalam kalangan masyarakat. Kaedah yang digunakan baginda ternyata sangat berkesan dan terbukti cemerlang dengan terlakunya tamadun Islam yang gemilang di persada dunia. Pastilah pilihan ini juga praktikal sepanjang zaman, bahkan paling berkesan menangani jenayah dan krisis sosial yang berleluasa berlaku dalam masyarakat kita pada hari ini. Nabi SAW sering menunjukkan contoh supaya mencegah dahulu sebelum mengubati. Adalah tidak adil masyarakat dihukum sebelum

diberikan penerangan dan pendidikan yang tepat mengenai Islam. Usaha memberi pemahaman dan penghayatan mengenai Syariat ini sebelum menghukum seseorang, sangat wajar diperkasakan perlaksanaannya.

Terdapat beberapa metodologi tarbiyah dan keberkesanannya dalam mendidik manusia. Antara metodologi tersebut adalah melalui sistem tarbiyah kelompok dan kepimpinan yang baik. InsyaAllah metodologi ini akan dijelaskan dalam Buletin keluaran yang akan datang.

Rujukan

Al-Qur'an al-Karim.

Ibn Kathir, Abu al-Fida' Ismail b Umar b Kathir al-Qurshi (2002), *Tafsir al-Qur'an al-'Azim*, Sami b Muhammad al-Salamah (ed.), 9 j. c. 2, Riyadh: Dar al-Taibah.

Al-Qurtubi, Abu 'Abdullah Muhammad b Ahmad al-Ansari (2002), *Al-Jami' Al-Ahkam Al-Quran*, Hisham Samir al-Bukhari (ed.), 10 j, Beirut: Dar al-Ihya' al-Turath al-'Arabi.

Al-Nawawi, Muhyiddin Yahya b Sharaf Abi Zakaria al-Nawawi (2003), *Sahih Muslim bi Sharh Imam al-Nawawi*, 9 j. c. 7. Beirut, Lubnan: Dar al-Ma'rifah.

Ibn hajar, Ahmad b 'Ali b Hajar Al-'Asqalani (2000), *Fath al-Bari Sharah Sahih al-Bukhari*, 13 j. Riyadh: Dar al-Salam.

Berita Harian, bertarikh 13 September 2016

<http://muftiwp.gov.my/ms/bayan-linnas-cat/1032-bayan-linnas-siri-ke-84>

<http://facebook.com/mfadli11>

<http://unikversiti.blogspot.my/>

